



QUÆSTIO MEDICA,

QUODLIBETARIIS DISPUTATIONIBUS,
manè discutienda, in Scholis Medicorum,
die Jovis vigesimâ Decembris.

M. ARMANDO JOSEPHO COLLOT,
Doctore Medico, Præside.

An Temperamentum Melancholicum præstantius?

I.

TEMPERAMENTUM hominis quatuor emergit ex humoribus, variè permistis, temperatis; horum si quis exuperat, inde Temperamentum nominatur, sanguineum, si dominatur ea pars humorum, quæ sanguis audit; Pituitosum, si pituita; si bilis, Biliosum; si terrenus humor, Melancholicum. Utilissimus liquorum sanguis, sine quo, nec functionum perfectio, nec alimonia partium. Pars sanguinis tenuior, per cribrosam cerebri substantiam trajecta, fit origo spirituum; crassior abit in nutritionem corporis: utraque citius exolveretur, ni novâ chili materie repararetur: Hic ope fermentorum confectus ex cibis, repetito circuitu convertitur in sanguinem. Sic perenni

liquorum motu fovetur vita, prorogatur, purpureusque latex pro diversitate molecularum quibus conflatur, variis nos afficit modis. Hinc Temperamentorum mira diversitas; sed hæc inter laudabilius, quod animo simul & corpori firmiorem conciliat sanitatem.

I I.

HOMO dissimillimis constat ex partibus, anima, corpore: illa cælo, hoc parentum semini suam debet originem: utraque pars beneficio spirituum functiones vitæ perficit, si ritè conformata sint organa, temperata. Sic producit humanam felicitatem, sana mens in corpore sano. Is mentis integer, qui rationem sequitur ducem, sequitur & naturam; qui rebus in omnibus auream servat mediocritatem, vacat & animi perturbationibus. Viget in corpore, qui liberè respirat, sentit acutè, movetur expeditè, qui probè cibos concoquit, egerit excrementa, à morbis difficilè tentatur, facile resurgit: has dotes qui non laudaverit, optaverit, is mente laborat & corpore.

I I I.

QUAM LIBET expende Temperiem. Sanguis ubi plurimus est, corpus paucis beat commodis, animum quadam tenùs affigit humi, mediocres excitat virtutes, urbanitatem, clementiam: sanguineos videas extemporaneæ subtilitatis homines, simplices, apertos; sed quàm proclives ad amorem, genio deditos, laboris impatientes! Biliosorum non minus infausta temperies: In iis qui turget

humor, quam præposteros motus impertit animo, corpori! Iracundiæ, furoris, phrenitidis teterrima parens est, icteri quoque, phthileos, dysenteriae. Pituitosi quàm segnes, somniculosi! quàm cogitatione tardi, graves sensibus, studiis inhabiles! eos quàm sæpè Paraliticos videas, Arthriticos! his caret incommodis, cui Melancholica contigit indoles.

I V.

IN Melancholicis summa sunt omnia, valentissima: solidiori constant ex materie, numerosum venarum genus, arteriarum pulsatilis familia, nervorum animatæ phalanges, fibrarum funiculi, spiritus opifices functionum; Ossa quoque duriora sunt, pectus latum, firma latera. Cernitur & oris gravitas plena iudicii, memoriæ; lingua parca, mens clausa, animus propositi tenax, rebus in arduis constantissimus, audax omnia perpeti. Alto corpore repositum manet humidum vitæ fomes, sanitatis. Viget in cerebro calor ad inventionem rerum, durat ad perpensionem. Quandoque fiunt insolentes illæ mentis agitationes, *ἐκπλήξεις*, quas admirari facilius est quam enodare; fiunt & ingenia rerum sublimium comprehensione quasi *δαίμονιώτεα*.

V.

PRÆSTANT itaque Melancholici cæteris hominibus; nutriuntur melius, rarius ægrotant, diutius vivunt; si se dederint artibus, mirum, quos illi progressus habuerint! quàm summi oratores evaserint, Poëtæ, Medici! quantum floruerint in rebus bellicis, Mechanicis! Ad difficillima quæque semper

attenti sunt , nec tam facti , quam nati ; nec unquam
 minùs ociosi , quàm cum ociosi sunt. Quod biliosus
 homo , pituitosus , quod sanguineus vix attingit , id
 assequitur , peragit Melancholicus. Felix igitur Me-
 lancholica constitutio , firmissimæ sanitatis parens ,
 perficiendis corporis & animi functionibus accom-
 modatissima , prorsus Athletica est , Heroica , Regia.

Ergo Temperamentum Melancholicum præstantius.

Domini Doctores disputaturi.

M. Michaël Sauvalle.

M. Alexander-Petrus Mattot.

M. Germanus Preaux ,
 Professor Regius.

M. Ludovicus Piquenot de
 Dragnville.

M. Claudius Bourdelin.

M. Petrus Daxin, Medi-
 cus Regis ordinarius.

M. Claudius Burlet,
 Scholarum Professor.

M. Joannes-Franciscus Foy-
 Vaillant.

M. Joannes Cordelle.

Proponebat Parisiis PHILIPPUS BERNARDUS
 DE BORDEGARAYE, Parisinus, Baccalaureus
 Medicus. A. R. S. H. 1696.

Apud Franciscum Muguet, Regis & Facultatis Medicinæ
 Typographum.